

# L'imperi il pli vast dal mund

La Russia sco stadi multicultural


DA GUIU SOBIELA-CAANITZ

■ Il 2015 ha la chasa editura «Autrement» (Paris 7) publitgà in atlas dals imperis colonials dal 15avel al 21avel tschientaner (1). Quel volum da 287 paginas tracta strusch l'intschess da l'imperi russ oz (17 098 246 km<sup>2</sup>), numnadamain mo duas giadas. P. 79 musa il port pacific da Petropavlosk Camtschatskij cun l'exploratur Vitus Behring (1681–1741), uffizier da la marina imperiala russa. P. 141 musa l'insla Sahalin en il Pacific e l'anneziun russa da sia mesadad nord 1855; l'entira insla fascheva part da l'Uniu sovietica (URSS) suenter 1945.

La carta intitulada «Le 'Grand Jeu' en Asie centrale (1877–1907)» (p.130) musa l'expansiun russa tranter il Pamir, la Mar d'Aral e la Mar Naira. Pertge na resguarda l'atlas betg las conquistas da l'imperi russ davent dal triumf sin ils Tatars da Casan 1552? Il volum tracta ils imperis colonials, ed ils suverans russ han simplamain annectà ed il pli pussaivel integrà las populaziuns suttamessas: Colonias per propi na devi l'emprim betg. Zars e zaras dominavan plis pajais, ma lur imperi sco stadi era russ e mo russ. «Russland als Vielvölkerreich», ovra classica da l'istoricher Andreas Kappeler (2), menziuna ina «koloniale Expansion in Asien» (p. 139) pir cun il reglament administrativ davart la Sibiria decretà 1822 da guvernatur cont Mihajl Mihajlovitsch Speranski (1772–1839). Ins po resumar sco suonda il passà da l'intschess russ actual enfin a la nashientscha da l'Uniu sovietica (URSS, 31 da december 1922).

## Da la Volga al Pacific

Kappeler punctuescha: «La conquista da Casan [1552] è stada in pass fin lura mai-



L'atlas dals imperis colonials dal 15avel al 21avel tschientaner.

MAD

dudì en l'istorgia dal stadi da Moscau (...). Quest annectava in [auter] stadi suveran che fascheva però part (...) da la cuminanza islamica (...). Quatter onns pli tard ha la Russia conquistà il principadi d'Astrahan. Ella è pia vegnida adaquella da posseder pajais cun pliras etnias

e religiuns» (p. 25). La famiglia d'impresaris Stroganov, sustegnida da la regenza russa, «s'interessava per il pail dals animals en ils guauds ad ost da l'Ural. Ina rotscha da cosacs (...) en servetsch da Stroganov ha conquistà 1581/82 la chapitala dal principadi per il curs inferior

dal flum Irtisch. Il zar ha l'emprim tardivà; lur ha'l segirà l'intschess da lez principadi cun bleras fortezzas (...). En l'emprima mesadad dal 17avel tschientaner èn traplists, aventuriers, commerziants e cosacs russ, sco er secziuns da l'administraziun militar regiunala, avanzads vers l'orient (...). Il motiv principal da l'expansiun remartgablmain sperta sur passa 6000 km era anc adina il butin da pels, oravant tut quellas da zibelins (...). Quai ha decimà spert ils animals dals territoris ils pli accessibels, manond adina ad urbanisar intschess novs (...). Ins prezziava era dents da chavals da mar e metals prezzius. Er il zar da Moscau s'interessava da tut quai (...) e sa segirava ina part considerabla dal profit economic cun tributs e dazis. Ins ha cuntanschì il flum Jenissei gia 1607 (...); 1639 stevan las emprimas rotschas russas per il Pacific (...). Igl è i pli plaun a l'ur da la steppa: 1643 èn ins arrivà sper il Lai Bajcal (...). 1689 ha il patg da Nertschinsk fixà il cunfin cun la China (...). En l'emprima mesadad dal 18avel tschientaner ha l'expansiun russa pertutgà er il chantun nordost da l'Eurasia cun las peninslas da Tschucota e Camtschatca. Ils blers pievels da la Sibiria han resistì (...). Ils zars admonivan adina puspè lur represchentants da tractar ils indigens cun bainvulientscha e clemenza (...). Ma ils administraturs regiunals ed ils traplers, commerziants, cosacs ed aventuriers russ na respectavan betg adina lezs cumonds. Moscau era dalunsch, e la corrupziun, l'arbitrari amministrativ, l'extorsion, la sclavitid illegala (cunzunt da femnas indigenas), rapina e violenza eran la realitad da mintga di (...). Durant il 17avel tschientaner èn adina dapli purs russ vegnids a star en Sibiria» (pp. 38–40). Entant pruvava la Russia da suttametter er ils pievels da la Volga e da l'Ural. 1586 ha'la fundà la

fortezza d'Ufa e 1735 quella d'Orenburg. Cunzunt ils Baschkirs èn adina puspè sa revoltads.

## 19avel e 20avel tschientaner

La Russia dal 19avel tschientaner, suenter la refurma da Speranski, era cleramain ina pussanza coloniala. Guvernatur Nicolaj Nicolajevitsch Muravjov, cont Amurski (1809–1881), ha schlargià ses cunfin en l'Orient Extrem. El ha profità da la flaivlezza da la China per conquistar «la riva dal Pacific a sid dal flum Amur enfin al cunfin da la Corea, (...) nua ch'el ha fundà (...) ina basa da marina ch'è vegnida spert impurtanta sco port. La citad (...) ha el numnà Vladivostoc ('dominatura da l'Orient') (...). La colonisaziun cun purs slavs, l'emprim mo plaunsieu, è creschida pir a l'entschatta dal 20avel tschientaner grazia a l'avertura da la viafier tras la Sibiria. 1905 ha il Giapun, pussanza asiatica nova, fermà l'expansiun orientala da la Russia» (p. 172). Lezza, gia indeblida, ha tuttina sustegnì 1914 la Serbia cunter l'Austria-Ungaria suenter l'attentat da Sarajevo; Vienna ha lura declarà la guerra al zar. Quest ha stuì abdtigar da mars 1917; il november è nashida la Republica sovietica russa, la quala, da mars 1918, ha suttascrit in contract da pasch cun Vienna e sia aliada tudestga. 1922/23 è la Russia sovietica vegnida la commembra dominante da la nova URSS. Questa «ha chalà d'exister il davos di da 1991» (p. 317); la Russia d'oz, uffizialmain «Federaziun russa», è il pli vast da ses quindesch stadis successurs.

1. Marcel Dorigny et alii, *Grand Atlas des empires coloniaux*. Paris 7 2015 (Autrement, [www.autrement.com](http://www.autrement.com)), ISBN 9782746742406.

2. Andreas Kappeler, *Russland als Vielvölkerreich*. Minca (C. H. Beck) 1992, ISBN 3 406 36472 1, p. 25.